

AUTONOMISCJ ...PUSTIÇS!

Il "Comitât Provinciâl pe Autonomie Furlane" al à publicade une mozion cuintri "ogni manovre" che e tindi a dâ al Friûl une forme di autonomie plui largje che no aes altris regjons talianis.

O vin cjalât simpri cun cualchi brut scrupul chest "Comitât" indulà che a jentrin capitaliscj, possidents, ebreus, framassons, milionaris: o vin simpri vude pôre che cierte int, convertide ae autonomie al ultin moment, si sedi fate indenant par inturbiâ lis aghis, par meti cualchi tres intes ruedis o almancul par jessi pronte a racuei dulà che altris a àn semenât. Vîno sbaliât?

Cun chê mozion il Comitât al dîs "di interpretâ il pinsîr di ducj i furlans". E cheste e je une bale. Intant nol interprete il nestri, che al ven a jessi il pinsîr di cualchi miâr di furlans nestris abonâts, letôrs e amîs che nus àn fat cognossi il lôr consens ancje a vôs e cun centenârs e centenârs di letaris.

E po cuant isal stât interpelât il popul furlan sul cont des autonomiis speciâls? No ise ore di finîle di proclamâsi bessôi partevôs di dut un popul, cuant che si fevele nome daûr des propis personalissimis opinions o interès? La mozion e dîs che lis autonomiis speciâls pal Friûl no son mai stadis e no son domandadis dai autonomiscj furlans.

A son almancul sîs mêis che nô e altris o batìn chest cantin. O sarin pûr furlans e autonomiscj ancje noaltris. E la famose publicazion de Cjamare di Cumierç, mandade fûr da un Comitât dulà che a comparissin dutis lis personalitâts plui in viste dal Friûl (linguiscj, storics, predis, deputâts, autoritâts e scuasit ducj i components dal Comitât provinciâl stes) no disie testualmentri a pagjine 98: "Considerando i quali (fatti) non è da prendersi alla leggera anche il problema di un eventuale - e per noi auspicato - statuto particolare da concedersi alla regione dopo uno studio accurato della situazione" Ohelà, zuino di bussulots? E dute la campagne autonomistiche dal 1922 e 23 ce ise stade?

La mozion dal Comitât Provinciâl e à cûr di dî "non sussistono i presupposti che per le accennate regioni (Sicilie, Sardegna, Val d'Aosta e Trentin) che possono consigliare degli statuti particolari" O vin dit e mostrât tantis voltis che chestis cundizions - etnichis, linguistichis, storichis, gjeopolitichis - a son plui netis e plui fuartis pal Friûl che no pe Sardegna o pe Sicilie, e pôc su pôc jù companis di chês de Val d'Aosta e dal Trentin. Nissun in mò nol è stât bon di mostrâ il contrari: al plui cualchidun si è contentât di sentenziâ di no, cence nissun resonament.

E alore cuâl puèdial jessi il parcè di cheste paiaçade? O credìn che al sedi tornât di mieç il malandret zûc dai partîts. Prime a jerin cuintri la autonomia

chei di çampe, par une sole reson: che la autonomie e jere favorite de Democrazie Cristiane. Cumò a àn dreçât lis orelis e lis ongulis chei de diestre e cualchi democristian nome parcè che a favôr dal ordenament particulâr al varès fevelât Togliatti. I vêrs interès dal Friûl no àn impuartance pai nestrîs esponents dai partîts. Cheste e je la veretât.

pre Bepo - Patrie dal Friûl / 1947